



agun erakarri zituen Algortara.

Izan ere, igandean bertan jakinarazi zen 2003. urteko Ibilaldiaren prestaketa lanak zein ikastolek egingo dituzten. Lekeitioko Azkue eta Ondarroako Zubizahar ikastolen artean antolatuko dute datorren urteko jaialdia, eta Lekeition ospatuko da; berriz ere, kostaldean.

Ibilaldiaren lekukoa kostaldetik kostaldera igarotzerakoan Lekeitioko ikastolako ordezkariak adierazi zuenez, «dagoeneko ilusioz beteta hasi gara lanean. Lan handia izango da, baina denon parte-hartzearekin arinduko duguna».

BEGOÑA ABAITUA

SAN NIKOLAS IKASTOLAKO SORTZAILEETARIKOA



MARISOL RAMIREZ / ARGAZKI PRESS

Begoña Abaitua, ezkerrean, Ibilaldiko zinta moztu ondoren.

«Bederatzi umerekin hasi ginen ikastolan, eta orain 900 ikasle ari dira han»

A.L. | GETXO

Berez irakasle ez izan arren, Getxoko San Nikolas ikastolako lehen irakasleetarikoa da Abaitua. Azken 39 urteetan, alabaina, Alemanian bizi da, kantu ikasketak egitera joan, eta hara ezkondu zenetik. Euskara galtzeko beldurra bihotzean duen arantza izan arren, dioen baino hobeto mintzatzen da euskaraz, barnetegian eskuratutakoari esker, agian. Alemaniatik etorri zen Getxoko Ibilaldira, eta omenaldia jasotzeak sortutako emozioa nabari zen haren begi eta hitzetan.

■ Nolatan hasi zinen 60ko hamarkadan irakasle lanean ikastolan?

Ni antzerki talde batean nengoen, Txinpartak taldean, eta halako batean, taldeko lagun batek esan zidan ikastola zabaltzeko jende bila zebiltzala. Hori entzun nuenean, lana utzi nuen eta ikastolako lanean hasi nintzen, ilusio handiarekin. Ume txikiekin nengoen, eta, beraz, jolastu eta abestu egiten genuen; hori bai, dena euskaraz.

■ Zenbat umerekin hasi zinen?

Lau urte inguruko bederatzi

umerekin hasi nintzen. Gaur, 900 ikasle ditu ikastolak!

■ Nola ikusten duzu euskararen egoera, gaur egun?

Aurrera doala pentsatzen dut. Bihotzean dugun gauza bat da, eta beti egin behar du aurrera. Gaztedia oso baikorra ikusten dut, aurrera egiteko gogoz, eta hala den bitartean, ez da galduko.

■ Zer sentitu duzu Ibilal-

SORRERA

«Ikastola sortzeko jendea behar zutela esan zidaten, eta lana utzi nuen»

EUSKARA

«Euskara asko galdu dut, eta hori bihotzean dudan arantza bat da»

diak omenaldia egin dizu-nean?

Ezin dut hitzekin azaldu. Oso, oso emozionatuta nago.

■ Gainera, bizitza erdia baino gehiago Euskal Herri-tik urrun daramazunean.

Bai, baina sarri etortzen gara Euskal Herrira. Hemengo jendearekin egotea behar izaten dut, geroz eta gehiago. Alemanian ez dut euskara entzuten, ez dut hitz egiten eta asko torpetu naiz. Hori, bihotzean dudan arantza da. Oporretan nire senarra nirekin etortzen da, eta berak ez daki euskaraz. Orduan, jende guztiak erdaraz egiten digu.

■ Ondo mintzatzen zara, halere, euskaraz.

Joan den urtean erretiratu nintzen eta, orduan, pentsatu nuen: egin behar dudan lehen gauzaberriro euskara eskuratzea da. Forura joan nintzen, AEK-ren barnetegi batera, eta hilabete pasatu nuen han, euskara entzuten eta egiten, euskaraz bizitzen. Euskararen egarria nuen. Aurten ere, nire senarra baino hilabete lehenago etorri naiz Mutrikura, jendearekin egon eta euskaraz hitz egitera. Horrela, astiro-astiro, ia berriro eskuratzen dudana.

GARRAIOA

Metroa erabiltzearen onurak, eta azken trenak galtzearen kalteak

Bilboko metroak atzo jakinarazi zuenez, 64.000 lagunek erabili zuten garraio publiko hori Ibilaldira joateko. Goizeko 10:00-etatik gaueko 22:00etara bitartean Bilbotik eta Bilbora bost minutu oro abiatu zen trenak, Ibilaldirako zerbitzu berezi gisa. Milaka lagunek gozatu zuten onura hori. Baina, jaialdi handi horietan parrandazale ugari ere bildu ohi da, eta, ehunka izan ziren azken trenak galdu, eta etxera itzultzeko zailtasuna izan zutenak. Hala, ilara luzeak izan ziren taxi geltokietan.

TENTSIOA


Tentsio uneak bizi izan ziren lehen orduetan

Goizeko 9:00ak baino lehen iskanbilak izan ziren Getxon. Hainbat talde txosnak jartzen saiatu ziren zirkuitu barruan, baimenik gabe. Txosna jartzeko materiala Udaltzaingoak eraman zuen kamioian, eta Ertzaintzak bi karga ere egin zituen bertaratutakoen aurka. Horrez gain, Ibarretxeren hizketaldian EHEko kideek EAJ-ren jarrera salatu zuten taula gainean. Ekitaldi berean, okupazioaren aldeko pankarta ere erakutsi zuten beste batzuek.

SALAKETA

PPk Ibilaldiko antolaketa salatu du

Getxoko PPk Ibilaldiko antolaketa salatu zuen atzo, haren «kokagunea herri barruan egiteak herritarrei sortu dizkien kalteak» direla eta. PPk salatu zuenez, kaleak itxita zeudenez, hiritar askok arazoak izan zituzten etxera iristeko eta zaratak ere kalteak sortu zizkien. Herri-gunetik kanpora antolatu behar zen Ibilaldia, PPren ustez.



Norbega S.A-k, Coca Colaren iparralderako kontzesionarioak, Ibilaldia 2002

jaia antolaketan lagundu du aurten ere. Hala, Norbegak herri honetako kultura ekimen garrantzitsuenetan parte hartzen du.